



Datë: 21.07.2025
Numër Protokolli: 6152/2025

A.nr.939/2025

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave në përbërje nga: Ardita Haxhnikaj Demi, kryetare, Eshref Shabani dhe Malsore Gashi Bajraktari, anëtarë, me Kaltrina Avdullahi Prenaj, në cilësinë e procesmbajtëses, në procedurë sipas ankesës me numër A.nr.939/2025, të datës 22.05.2025, të parashtruar nga ankuesit, M.Th, A.M, D.S, R.N, F.H, N.V-R, B.L, L.G të cilët sipas autorizimit të përbashkët i përfaqëson D.S, kundër organit të punësimit: Komuna e Lipjanit, në çështjen juridike “*kompensim material*” duke vepruar në pajtim me nenin 6 paragrafin 1 nën paragrafin 1.1 dhe nenin 18 paragrafin 1 nën paragrafin 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim, me datë 21.07.2025, mori këtë:

V E N D I M

I. Aprovohet si e bazuar ankesa A.nr.939/2025, e datës 22.05.2025, e parashtruara nga ankuesit M.Th, A.M, D.S, R.N, F.H, N.V-R, B.L, L.G, ashtu që, **detyrohet** Udhëheqësi i Burimeve Njerëzore në Komunën e Lipjanit, që brenda afatit prej 15 ditësh nga dita e pranimit të këtij vendimi, të rishqyrtoj kërkesën e datës 24.02.2025 të parashtruar nga ankuesit M.Th, A.M, D.S, R.N, F.H, N.V-R, B.L, L.G dhe të nxjerr akt administrativ në pajtueshmëri me dispozitat ligjore në fuqi.

II. Këshilli i Pavarur Mbikëqyrës për Shërbimin Civil të Kosovës duhet të njoftohet me shkrim pas ndërmarrjes së veprimeve në pajtim me këtë vendim.

A r s y e t i m

Nëpunësit civil, M.Th, A.M, D.S, R.N, F.H, N.V-R, B.L, L.G (në tekstin e mëtejme referuar: *Ankuesit*), më datë 22.05.2025, të cilët sipas autorizimit të përbashkët i përfaqëson D.S, kanë parashtruar ankesë në Këshillin e Pavarur Mbikëqyrës për Shërbimin Civil të Kosovës, kundër përgjigjes me numër protokolli 06.05.2025, të Njësisë së Burimeve Njerëzore në Komunën e Lipjanit.

Këshilli i Pavarur Mbikëqyrës për Shërbimin Civil të Kosovës (në tekstin e mëtejme referuar: *Këshilli*) bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave, ka proceduar kërkesën për përgjigje në ankesë tek Komuna e Lipjanit, ndërsa kjo e fundit, më datë 11.06.2025, ka përcjellë përgjigjen në ankesë se bashku me shkresat e bashkangjitura të lëndës.

Kolegji i Këshillit nga administrimi i shkresave të lëndës ka gjetur se ankuesit janë të punësuar në Komunën e Lipjani dhe se të njëjtit ushtrojnë pozitën e punës Zyrtar për Gjendje Civile në Sektorin e Gjendjes Civile.

Tutje, sipas shkresave të lëndës rezulton se më datë 24.02.2025, kanë parashtruar kërkesë të Njësia e Burimeve Njerëzore në Komunën e Lipjanit, duke kërkuar nga organi i punësimit që të zbatohet Vendimi i Qeverisë së Kosovës me Nr.08/226, i datës 23.10.2024 me të cilin është miratuar katalogu i vendeve të punës. Ankuesit kërkojnë nga organi i punësimit që pozitat e tyre të kategorizohen sipas nivelit Profesional 2, ndërsa, Njësia e Burimeve Njerëzore në Komunën e Lipjanit përmes përgjigjes me Nr.01-120/01-22382, ka njoftuar ankuesit se me kohë janë pajisur me akt emërimi të reja si dhe nga muaji Prill është bërë ndryshimi i kategorizimit, andaj Ministria e Financave nuk lejon të rritet numri i zyrtarëve prej atyre që janë aktual.

Ankuesit në ankesë e parashtruar në Këshillin e Pavarur Mbikëqyrës për Shërbimin Civil të Kosovës, pretendon se pozita e tyre duhet të klasifikohen ashtu sikurse është përcaktuar më katalogun e vendeve të punës. Kërkojnë nga Këshilli që të aprovoj ankesën si të bazuar dhe të detyroj organin e punësimit të shfuqizoj përgjigjen e dhënë në kërkesën e tij, duke obliguar Kryetarin e Komunës së Lipjanit që të bëjë rregullimin e pozitave të ankuesve në kategorinë Profesional 2.

Kolegji i Këshillit ndërlidhur me rregullat e veprimeve procedurale të një organi publik, ju referua dispozitave të Ligjit Nr.05/L-031 për Procedurën e Përgjithshme Administrative (*tutje referuar: LPPA*), përkatësisht nenit 10 paragrafi 2 ku përcaktohet se: *2. Organi publik zhvillon procedurën administrative sa me të shpejtë dhe me sa më pak shpenzime, për të dhe për palën, duke mos cenuar çfarë është e nevojshme për një rezultat të ligjshëm e të përshtatshëm të procedurës administrative*, si dhe nenit 97 paragrafi 1 të këtij ligji, ku përcaktohet se: *1. Një procedurë administrative e nisur sipas kërkesës, përfundon me njoftimin e një akti administrativ apo lidhjen e një kontrate administrative*, dhe si rrjedhojë në kuptim të këtyre dispozitave ligjore si dhe bazuar në shqyrtimin e provave materiale të çështjes, Kolegji i Këshillit konstatoi se organi përkatës i punësimit, në rrethanat e rastit konkret, nuk ka vepruar në pajtueshmëri me dispozitat përkatëse ligjore, në raport me kërkesën e datës 24.02.2025, të parashtruar nga ankuesit, ngase, sipas bazës ligjore si me sipër, vullneti i organit publik në realizimin e autoritetit publik formësohet në procedurë administrative dhe manifestohet në formën e njërit prej veprimeve administrative, siç janë: akti administrativ; kontrata administrative apo akti real, dhe se në vlerësimin e Kolegjit, organi përkatës i punësimit, në kuadër të autorizimeve të përcaktuara me legjislacionin në fuqi, është dashur që të nxjerr akt administrativ në kuptim të vendosjes dhe të njoftoj palët për aktin e tillë, brenda një afati prej 45 ditësh sikurse përcaktohet me nenin 98 paragrafi 2 apo afatit të vazhduar sipas nenit 99 paragrafi 1 të LPPA-së.

Kështu që, thënë si me sipër e duke u bazuar në nenin 18, paragrafin 1, nën paragrafin 1.4 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji i Këshillit vendosi të aprovoj si të bazuar ankesën e datës 22.05.2025, në kuptim të shkeljeve procedurale, dhe si rrjedhojë detyroj Udhëheqësin e Burimeve Njerëzore në Komunën e Lipjanit, që në respektim të dispozitave procedurale të shqyrtoj kërkesën e ankuesve të parashtruar më datë 24.02.2025, dhe të nxjerr akt administrativ në përputhshmëri me dispozitat ligjore në fuqi.

Këshillë Juridike: Vendimi hyn në fuqi në ditën e nënshkrimit nga Kryetarja e Kolegjit. Pala e pakënaqur, e cila pretendon se vendimi i Këshillit nuk është i ligjshëm, mund të iniciojë konflikt administrativ në Gjykatën Themelore në Prishtinë/Departamenti për Çështje Administrative, brenda afatit prej tridhjetë (30) ditësh, nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda me numër A.nr.939/2025

Kaltrina Avdullahi-Prenaj

Procesmbajtëse

Ardita Haxhnikaj Demi

Kryetare e Kolegjit

Vendimi i dërgohet:

- *Përfaqësueses të ankuesve: D.S;*
- *Udhëheqësit të Njesisë së Burimeve Njerëzore në Komunën e Lipjanit; dhe*
- *Arkivit të KPMSHCK-së.*